

## lis Gnovis

## ■ GURIZE. Di viaç, ma personis

Il mensil «Altreconomia», cul jutori de clape «RiVolti ai Balcani», al torne a documentà lis strussis dai migrants ch'a rivin in Furlanie, dopo di vè traversade la «Trate balcaniche». Tal video-reportage «Gorizia: persone in transito e solidali. Istituzioni non pervenute», al ven presentât ce ch'al sucêt, dibot ogni gnot, dentri e fûr de stazion dai trens di Gurize, ch'è varès di restâ vierte di 5 di matine a une di gnot. Int di passaç, comprendudis fameis cun frutins di scune, a cirin un ripâr par passâ la gnot, prin di partî par Milan e par destinazions tai País dal Nord Europe. I voluntaris ju clamin «Transitanti», stant che nissun nol domande plui di fermâsi chenti e che nol cîr di presentâ une «domanda di asilo» a Gurize o a Trieste. Il video al è disponibil a la direzion: [https://www.youtube.com/watch?v=A\\_D2wreGX24](https://www.youtube.com/watch?v=A_D2wreGX24).

## ■ GORIŠKA. Une menace pe int dal Lusiņ

Ancje «Cipra International» e il reladôr speciâl des Nazions Unidis, David Boyd, a denunzin i pericui causionâts de plui grande fabriche pe produzion di ciment in vore in Slovenie. Il stabiliment de societât «Salonit Anhovo», logât tal cjanâl dal Lusiņ (Cumon di Deskle, Regjon Goriška), al prodûs 4 mil toneladis di ciment in di e, cun di plui, par funzionâ, al bruse 100 mil toneladis ad an di scovacis. La fabriche e je part dal grop «w&p Cementi SpA», ch'al a une base ancje a San Vît dal Tiliment. Seont i ambientalistis e l'Onu, ch'è ativitat industriâl «e menace la salut de popolazion locâl par colpe dal incuinament atmosferic», a doi pas dal Parc dal Triglav. La fabriche e je stade incolpade, za timp, ancje di difondi amiant. Grande preocupazion, in zornade di vuê, e je causionade dal intindiment di dopleâ la cuantitat di scovacis di brusâ (rivant a 600 toneladis in di), tignût ancje cont che «brusâ scovacis tes fabrichis di ciment al a regulis mancul duris a pet di ce ch'al ven pretendût pai incinisidôrs normâi», cemût ch'a denunzin «Ong» e Ordin dai medis de Slovenie.

## ■ PUART. Storie, croniche e modis

Fintremai ai 5 di Fevrâr dal 2023, li dal Palaç dal Vescul di strade dal Seminari, a Puart, si podarà rimirâ la mostre «L'Italia di Magnum da Robert Capa a Paolo Pellegrin». L'esposizion e intint di contâ la storie, la croniche e lis modis talianis de fin de seconde vuere mondiâl al di di vuê, a traversi dai voli dai fotografis ch'a àn lavorât pe agenzie fotografiche «Magnum Photos». La mostre e je vierte di martars fin joibe (14.30-18.30), di vinars (14.30-19.30) e sabide, domenie e dîs di fieste (10-19).

## ■ TARENT. Paisaçs umans e naturâi su lis Dolomitis

E je stade screade li dal Museu des Sciencis «Muse» di Trent la mostre didatiche «Dolomiti patrimonio Unesco fenomeni geologici e paesaggi umani». E restarà vierte fintremai ai 9 di Zenâr dal 2023 e po e podarà jessi domandade par altris esposizions, midiant dal lûc internet: [www.tsm.tn.it/attivita/le-dolomiti-patrimonio-mondiale-unesco-fenomeni-geologici-e-paesaggi-umani-mostratinerante](http://www.tsm.tn.it/attivita/le-dolomiti-patrimonio-mondiale-unesco-fenomeni-geologici-e-paesaggi-umani-mostratinerante). Te realizazion, e a colaborât ancje l'Universitât furlane. I 18 tabelons ch'a componin la mostre a svilupin cuatri cuistions: Lis Dolomiti Patrimoni mondiâl; Nature e paisaçs umans; Lis frecuentazions des Dolomiti; I nûf sistemis des «Dolomiti Unesco» (comprendude la purizion furlane).

Miercus 21	S. Pieri Canisio	Domenie 25	Nadâl dal Signôr
Joibe 22	S. Francescje Saverio C.	Lunis 26	S. Stieffin martar
Vinars 23	S. tis Vitorie e Anatolie	Martars 27	S. Zuan apuestul
Sabide 24	S. Irmine	Il timp	Zornadis fredis



**Il soreli**  
Ai 21 al jeve aes 7.46  
e al va a mont aes 16.24.



**La lune**  
Ai 23 Lune gnove.

**Il proverbi**  
Dut si juste fûr che il vues dal cuel.  
**Lis voris dal mès**  
E je ore di saludâ ancje il 2022. Chesçj a son dîs di fieste e di polse cui nestrîs cjârs. Tal ort il teren al è glaçât.

## La pâs no pues spietâ

Finanziâ la «Difese populâr no violente» cu lis tassîs

«**A** l'è tornât il moment di palesâ la nestre opozizion a la politiche dai armaments ancje mediant dal paiament des tassîs, in mût di gjavâi risorsis al implant militar».

Cuarante agns daspò de prime «Campagne pe Obiezion fiscâl a lis spesis militars», guidade dal «Moviment noviolente», e 30 agns daspò dal riviel fiscâl discjadenât de «Prime vuere dal Golf», quant che i obietôrs fiscâi a forin un 10 mil di lôr, e torne in Italie une mobilitazion populâr «finalizade a ridusi lis spesis militars e a sburtâ viers une forme gnove di Difese».

La Campagne di disubediencia civil «Sei per la Pace, Sei per Mille» e je ordenade de clape telematiche di volontariât «PeaceLink», ative dal 1991. Daurman a àn garantît il so jutori in-teletuâi e operadôrs di pâs de vualece dal missionari combonian Alex Zanotelli, di pre' Luigi Ciotti dal «Gruppo Abele», di Moni Ovadia, di Francesco Gesualdi e di Roberto Mancini.

In pratiche – al a sclârît sul cotidian catolic «Avvenire» il puarte vòs dal «Centro Nuovo Modello di Sviluppo», Francesco Gesualdi – duç chei ch'a dividin la Campagne civiche a varan di «paiâi il sîs par mil de sò imposte Irpef a la Tesorarie centrâl de Protezion civil o a di un'altra realtât ch'è vebi finalitâts coerentis cu la Difese civil no armade e no violente. Cun di plui, a varan di compagnâ la sò sielte cuntune domande di rifusion di spedile a l'Agenzie des jentradis, cul fin di creâ un câs politic ch'al oblei il Guvier e il Parlament a ocupâsi de cuistion». Il prin pas di fâ, seont la Campagne, al è chel di



Un spieli de tragjedie ucraine e dai efets de vuere

In vore la Campagne «Sei per la Pace, Sei per Mille» a pro de pâs e cuintri des armis

dâsi in note su la plateforme telematiche <https://peacelink.it/seipermille>.

La Campagne «Sei per la Pace, Sei per Mille» e je coerente cu la propueste de «Rêt Pâs e Disarmament» ch'a son agns e agnorums ch'è domande al Parlament, cuntune schirie di altris clapis, l'aprovazion de leç pe «Istituzion dal Dipartiment de Difese civil no armade e no violente» ([www.difesacivilnonviolenta.org/](http://www.difesacivilnonviolenta.org/)). Te sò propueste, il moviment pacifist al previôt ancje l'«Opzion fiscâl», «al ven a stâi – al motive Gesualdi – la pussibilitât pal contribuent di destinâi al gnûf Dipartiment il sîs par mil dal so Irpef».

La propueste di une Obiezion fiscâl gnove – si po lei su la presentazion de Campagne – e intint di jessi une reazion positive par une situazion di crisi. La rispueste che l'Occident i a dât a l'agression russe de Ukraine e je daûr a pandisi dal dut falade e pericolose. La spedizione di armis in Ukraine, decidude de Nato..., e zove

dome par sprlungjâ la lungje ferede di muart e di distruzion di chel País. Cun di plui, la corse pal riarmanament dai Stâts Unis e dai País europeus, compagnade cu la presince massive di soldâts sul confin orientâl de Europe, e rapresente un pericol mortâl pe pâs dal Marimont».

Par fondâ la sò propueste, i firmataris a pretendin il respit dal articulo 11 de Costituzion che, seont «PeaceLink», al è trasgredit de politiche dal Guvier talian, che nol ten nancje cont dal parê dai citadins domandâts di svariâts scandais. «Ancje la prospettiva di aumentâ lis spesis militars par rivâ al 2% al Pil e je grivie – a disin i pacifiscj ch'a àn inviât l'Obiezion fiscâl –, parcè che ogni Euro spindût par comprâ armis al è un Euro robât a la risoluzion des necessitâts de umanitât. I nemis vèrs ch'o vin di combati a son: miserie, disocupazion, malfunzionament des scuclis e de sanitât, crisi climatiche, disvinidrimet dal ambient e evasion fiscâl».

Mario Zili

## Tradizions furlanis dal mès par cure di Mario Martinis

## NADÂL

E je la plui grande fieste de tradizion cristiane che, celebrade ai 25 di Dicembar, e ricuarde la nassite di Jesù Crist a Betlem. In realtât no si cognòs la date precise dal event, che la Glesie occidentâl e tacâ a celebrâ in chest di tor la seconde metât dal Cuart secul, soredut par rimplacâ la fieste pagane dal Nadâl dal Soreli (Dies Natalis Solis Invicti), peade al solstizi e duncje ai antîcs cults solârs. In ogni câs, pai cristians il «Soreli di justizie» al jere propri Jesù Crist. Tal an liturgic la fiestone e je prontade dal Avent (cuatri setemanis tal rît roman, sîs in chel ambrosian), che une volte al jere timp di astinencis, dizuns, cun diviet di bal, gnocis e baldoriis. In Friûl e jere tradizion spietâ il Nadâl cuntune novene une vore sintude dal popul che jemplave lis glesis (il famôs Missus, Devetiza te Sclavanie) fate tes seris jenfri il 16 e il 24 di dicembar. Invezit ae miezegnot dai 24 in duç i pais e vignive celebrade la Messe di miezegnot che vignive clamade «Madins» dal non



dai ufizis «Ad Matutinum» che une volte a cjantavin i religjôs. Ae vilie de grande fieste a jerin peadis diversis usancis populârs. Une volte tal dopomisdî sul fogolâr si impiave il çoc plui grant de anade e ator si cjatave la famee cu la parintât a prea e cjantâ e fâ ancje cualchi pronostic e cualchi semplice pratiche di divinazion. Sot sere si consumave une cene «di magri» par podê ricevi la comunione te messe plui famose dal an. Dopo la jessude de glesie, tor la une di gnot, chei che podevin si fermavin tes tratoris a mangjâ la innomene sope cu lis tripis e vin blanc. La sere de vilie di Nadâl i vecjos des fameis slovenis dal Friûl di Soreli jevât, a fasevin il zir dal broili e a vuadolavin cun aghe benedete ogni lûc preant pal benstâ des personis, la prosperitât dai animâi e la conservazion des robis e dai ambients. Lis cerimonis religjosis dal Timp di Nadâl si slungjavin fin ae Epifanie, come lis tradizions populârs che si tignivin par dodis dîs e dodis gnots.